

# **Katechismus**

*Katechismus - XVI*

**Erb, Matthias**

# Vorwort

Wieder einmal ging ein Jahr vorüber, und wir befinden uns am Ende des Jahres 2020 – Zeit, einige Bücher noch aufzuarbeiten, die ich Euch anbieten möchte.

Dieses Jahr hat uns allen eine Menge abverlangt – doch Gott hat uns hindurchgetragen.

Für mich persönlich bot die Zeit, die ich gewonnen habe, die Gelegenheit, einige neue Bücher zu erstellen. Gleichzeitig überarbeite ich viele der alten Bücher, sei es, um Fehler zu beheben oder neue Inhalte hinzuzufügen. Zunächst möchte ich die bestehenden Autorenbücher bearbeiten, danach sollen dann die Bücher zum Kirchenjahr, die Andachtsbücher und 1-2 neue Reihen aktualisiert werden.

Vielleicht hat aber auch der eine oder die andere Lust, mitzumachen und neue Bücher zu erstellen – spricht mich einfach an.

Euch allen wünsche ich Gottes reichen Segen und dass Ihr für Euch interessante Texte hier findet. Für Anregungen bin ich immer dankbar.

Gruß & Segen,

Andreas

## **Befragung vor dem Abendmahl**

**So ettliche knaben sich mitt der kirchen/ in niessung des HERREN  
Nachtmals vereinbaren wöllen/ die werdent vor dem tisch des HER-  
REN in der gmeind also befraget.**

Frag. Was ist eüwer beger?

Antwort. Wir begeren danck zusagen Gott dem himlichen vatter/ vnd den tod vnsers HERREN JESu Christi/ vnd mitt seinem erwidigen Nachtmal vns vereynbaren mitt dem leib Christi/ welches ist seine Kirche.

Frag. Was ist das Nachtmal Christi für ein Handel?

Antwort. Es ist ein heyliges vnd gewissen puntzeichen/ des neüwen punts oder testaments.

Frag. Was ist der neüw pundt?

Antwort. Er ist ein steiffe verhiessung der gnaden Gottes/ vnd verzeihung der sünden/ on allenn vnseren verdienst/ durch den treüwen heylandt Jesum Christum/ vnns als ein freye schenck überkommen vnd eroberet.

Frag. Erlangt man mitt dem nachtmal die verzeihung der sünden?

Antwort. Nein/ sunder mann entpfacht ein heyliges zeichen der verzeihung/ durch den todt Christi beschehen/ vnd gibt man aber dem bedeutenden zeichen/ den namen dessen daß es bedeütet.

Frag. Wer hat daß nachtmal auffgesetzt?

Antwort. Christus Jesus der ewig sun Gottes/ vnd obrister priester.

Frag. Mitt was weiß vnd gestalt haltet man sie?

Antwort. Also haltet man die ware einsatzung Christi, wan man in der gmein Gottes/ nach dem befelch Christi außspendet den einsatz/ der heylsamen vnd danckbaren gedächtnuß des gecreützigten vnd hingebnen Christi.

Frag. Wie geschieht aber das?

Antwort. So der gleübig isset das brott vnd drinckt den wein der dancksagung eüsserlichen mitt seinem mund/ innwendig aber wirdt er nach dem wort Christi warhafftiglich gespeiset/ mitt dem leib Christi/ vnd getrenckt mit seinem heyligen blut/ also daß Christus in ihm/ vnd er inn Christo bleibe.

Frag. Wie lautend die wort dises handels?

Antwort. Jesus an der nacht da er verrathen ward/ nam er das brott/ vnd als

er gedanckt hette/ hatt ers gebrochen vnnd gesagt/ Nemment/ essent/ das ist mein leib/ der für euch hingeben wird/ das thund zu meiner gedächtnuß. Deßgleichen nach dem Abentmal/ nam er das trinckgeschirr/ vnd sagt danck/ vnd gabs den Jüngeren/ sprechende/ Das tranck/ das neüw Testament ist inn meinem blut/ das für vyl vergossen wirdt/ zu vergebung der sünden/ so offt ihr das thund/ so thunds zu meiner gedächtnuß.

Frag. Was nutz vnnd frucht bringt dir das Nachtmal?

Antwort. Denn nutz bringts mir/ daß wir mitt denn jrdischen zeichen erinnert vnd gereitzt werden/ durch Gott den heyligen geist zu glauben/ daß Christus das brott des lebens sey/ der vns ewig mitt seinem leib speyse/ vnnd ewig liebe/ vnnd daß wir auch also mitt brüderlicher liebe alß einn brott zusammen gewürckt/ in einigkeyt vnnd brüderlicher treüw gegen vnserem nechsten leben.

Frag. Begerent jr also gemeinlich nach dem befelch Christi/ mitt einfalt zu glauben/ vnnd mitt besserlichem leben der Kirchen Christi einn vorbild zu sein?

Antwort. Ja/ mitt beistand vnnd hilff des HERREN/ dann durch vnns selbs vermögen wir weniger dann nichts/ darumb wir uns ernstlichen befleissen wöllen/ für alle vnser gepresten vnnd mangel ihn anzuruffen/ rc.

### **Darauff bittet der diener des Nachtmals.**

Der HERR Gott aller gnaden vnd barmhertzigkeyt/ lasse eüch erwachsen vnd erstarcken inn der erkantnuß vnser seligmachers Jesu Christi/ durch die krafft des heyligen geists/ auff dz jr im willen Gottes frommlich vnd erbarlich lebend/ nach disem leben/ das ewig besitzen/ Amen.

## **Catechismus und Underweisung christenlichs Glaubens**

**in deß Hochgebornen Herren/ Herren Georgen/ Graue zu Würtemberg/ vnd zu Mümpelgart/ rc. Graffschafft Harburg/ vnd Herrschafft Reichenwyler/ der Jugend zu dienst vnd gutem beschriben.**

### Vorrede

**Den Kindern Christi der Graffschafft Harburg/ vnd Herrschafft Reichenwyler/ gnad vnd frid von Gott dem Vatter.**

GEliebte kinder im Herrn/ eüwer eyffer vnnd ernst/ auch vnsers dienstes mühe vnd arbeyt ist (Gott hab lob) wol erschossen. Dann nach dem wir in den vier schulen/ auch sunst in der Kirchen/ bißher den allen kurtzesten Catechismus gebraucht/ haben jr den selbigen so hertzlichen gefasset/ vnd außwendig gelernet/ daß wir vor langest/ eüwer gehorsamkeit pflichtig weren gesein/ ettwas weyter hinein zu füren/ in die geheimnuß des reichs Gottes. Dieweil aber die fernderig pestilentz/ auch andere schwere krankheiten/ kriegsläuff/ vnnd andere geschäfft/ solchs bißher gehindert/ haben wir solchs jetzund wöllen leisten/ vnd den auff das besserlichst gemeret/ in truck geben/ auff daß nit allein die/ so in der schul (welchen doch nützlicher wer/ selbs schriben) solchen on arbeit haben/ sunder vil mehr denen/ so von der schul zur handarbeyt angestellt/ vnd nit müssig zu schriben/ auch den haußüättern so lesen künden/ mögen bekummen. Andern kirchen Christi/ deren vil in Teütschlandt seind/ auch andern Catechismis/ die dann höher seind dann der vnser/ haben wir disen on verachtung/ nach gelegenheit vnsers Elsessischen gepirgs/ vnd kirchen geordnet/ den man zum jar zwelfffmal gantzlichen mag Examinieren vnnd verhören/ Dan allen monat gat er auß/ rc. Hiemit seind dem lieben Got im himmel/ vnnd dem heilandt Jesu Christo befolhen/ der die kinder hat heissen zu jm kummen. Lassen eüch lieben kindt/ die arbeit nit thuren zu lernen den weg Gottes/ vnd die ersten schulrecht vnsers glauben/ es wirt zu seiner zeit frucht bringen/ als sich dann erschinen hatt/ mit eüweren voffaren vnd schulgesellen/ welche Gott fernd hingezuckt/ vnnd sie an jrem letsten abscheid/ mit Christenlichem erseüfftzen/ ernstigem gebett/ festem glauben/ ja auch alle mal mit lobgesang/ vnd Psalmen singen/ das wol Cygneacantio ist/ jren geist in die hendt des himmelischen vatters fleissig befolhen haben/ daß doch vil hohen Doctoren/ Sophisten/ Fürsten/ vnd Herren/ vor zeiten überbliben ist. Der geyst Christi geleit eüch in alle warheit.

Die diener des worts der Graffschafft Harburg vnnd Herrschafft Reichenwyler.

### **Georg/ Graue zu Würtemberg/ vnd Mümpelgart/rc.**

IR berufften vnd geordneten der außspendung des Worts Gottes in vnser graueschafft Harburg/ vnd Herrschafft Reichenweiler/ Wir wünschen euch/ daß der Herr wölle gnad geben/ daß jr dasselbig zu nutz mit Christlichem eyfer/ gesunder leer vnd ewiger frucht/ volbringen mögen/ Amen.

Wir haben den zugeschickten Catechismus/ sampt der vnderweisung vnd leerung/ rc. so in yetziger vnserer oberkeyt/ diser zeit für die Jugent zu gebrauchen ist/ durchsehen vnnd gelesen/ wölt also durch den truck zuuolenden mitt fürtgon/ denn gnedigen Gott von hertzen anruffend/ vnd bittend/ daß zu Eer/ lob/ preiß/ vnd aufferbawung seins heyiligen worts/ zu nutz/ heyl/ vnnd warem beständigem glauben vilder seelen dienen mögen/ Amen. Actum den 10 Tebruarij/ Anno M. D. XLIII.

Vnseren Predicanten vnd diensern des worts/ inn vnser graueschafft Harburg vnnd herrschafft Reichenwyler.

### Das Vatter vnser.

Matthei VI. cap.

VAtter vnser der du bist in den himmlen/ Geheyliget werde dein namm/ Zu kumme dein reich/ Dein will geschehe auff erden/ wie im himmel/ Vnser täglich brott gib vns heüt/ Vnd vergib vns vnser schuldt/ wie wir vergebend vnseren schulderen/ Nitt für vnns in versuchnüß/ Sonder erlöß vnns von dem bösen/ Dann dein ist das reich/ vnd die krafft vnd die herlicheit ewiglichen. Amen.

### Der Christenlich Glaub.

ICH glaub in einen Gott/ vatter den almechtigen/ schöpffer himmels vnd der erden/ Vnd in Jesum Christum seinen einigen sun vnseren HERREN/ Der entpfangen ist vom Heyligen geist/ Geboren auß Maria der jungfrawen/ Der gelitten hatt vnder Pontio Pilato/ Er ist gecreütziget/ gestorben/ vnd begraben/ Abgefaren zu den Hellen/ Am dritten tag wider erstanden von den todten/ Auffgefaren zu den himmlen/ da sitzt er zur gerechten Gott des vatters/ des allmechtigen/ Dannen er künfftig ist zurichten die lebendigen vnd die todten. Ich glaub in den heyiligen geist/ Eine heylige gmeyne Christenliche kirchen/ gemeinschafft der heyiligen/ Ablaß der sünden/ Aufferstendtnuß des fleyschs/ Vnnd eyn ewigs leben/ Amen.

### Die gebott Gottes/

im andern buch Mose/ am XX.

Das erst gebott.

ICH bin der HERR dein Gott/ der dich auß Egypten/ auß dem diensthauß geführt hab.

Du solt kein andere noch frembde Götter vor mir haben.

Das ander gebott.

Du solt dir keyn graben oder geschnitz bild machen/ ja gar kein bildtnuß noch gleichnuß/ weder deren dingen die im himmel da oben/ noch deren/ die vnden auff erden sein/ noch deren die in wasseren seind vnder der erden/ du solt dich vor jnen nit bucken/ du solt jnen nit dienen/ sie weder ehren noch anbetten. Dann ich bin der HERR dein Gott ein starcker eyferer/ Ich straff die boßheit der vättern an den kinden biß ins dritt vnd vierdt geschlächt/ so sie mich hassend/ Barmhertzigkeit aber vnnd freütschafft beweiß ich biß in die tausende/ so sie mich liebend/ vnd meine gebott haltend.

Das dritt gebott.

Du solt den nammen des HERREN deines Gotts nitt leichtfertig/ oder üppiglich nemmen/ Dann der HERR wirt den nitt vnschuldig halten/ der seinen nammen leichtfertig nimpt.

Das vierd gebott.

Gedenck des Sabbath tags/ daß du jn heyligest/ Sechß tag soltu arbeiten/ vnd alle deine werck schaffen/ Aber am sibenden tage/ ist der Sabbath des HERREN deines Gottes/ an dem solt du kein werck thun/ weder dein sun/ noch deine töchteren/ weder deine knecht/ noch deine mägt/ noch dein vych/ noch der frembdling der in deiner stat thor wonet. Dann sechß tag hat der HERR himmel vnd erden gemacht/ vnd das meer/ vnnd alles waß darinnen ist/ Aber am sibenden tag hatt er geruwet von aller arbeit/ deßhalb hatt der HERR den Sabbath gefreyet vnnd geheyliget.

Das fünfft gebott.

Du solt dein vatter vnd muter inn hohen eeren halten/ auff daß du lang lebest im land daß dir der HERR dein Gott geben wirt.

Das sechst gebott.

Du solt nit tödten.

Das sibend gebott.

Du solt nit Eebrechen.

Das achtest gebott.

Du solt nit stälen.

Das neünd gebott.

Du solt nitt falsche zeügnuß geben wider deinen nechsten.

Das zehend gebott.

Du solt nit begeren deines nechsten hauß/ du solt nit begeren deines nechsten weibs/ knecht/ magt/ vych/ oder alles waß dein nechster hatt.

Dieweil der Glaub ein anfang des heyls/ vnd die thür ist zu der waren erkantnuß Gottes/ so ist das erst theil vnd fragstück von Christenlichem glauben

Frag. MEin liebs kind sag an/ was glaubst du doch?

Antwort. Ich glaub in einen Gott vatter den almechtigen/ schöpffer himmels vnd der erden/ Vnd in Jesum Christum/ rc. garauß.

Frag. Welches ist das erst pünctlin?

Antwort. Ich glaub in Gott vatter den almechtigen/ schöpffer himmels vnd der erden.

Frag. Wa von lautet der selbig?

Antwort. Von der erschöpfung.

Frag. Was bekennen wir mitt dem selbigen?

Antwort. Wir bekennen daß der einzig ewig vnd Almechtig Gott/ mit seiner Almechtigen krafft/ alle geschöpfft im himmel vnd auff erden gemacht hat/ welche er auch ewiglich behaltet/ vnd beherrschet/ nach dem wolgefallen seines willens.

Frag. Welches ist der ander artickel?

Antwort. Vnd inn Jesum Christum seinen einigen Sun vnsern HERREN/ der entpfangen ist vom Heyligen geyst/ geboren auß Maria der Jungfrauen/ rc.

Frag. Wa vonn lautett der ander punct?

Antwort. Von der Erlösung.

Frag. Was bekennen wir mitt dem selbigen?

Antwort. Wir bekennen vnns vngehorsame vnd verdampfte geschöpfft Gottes gewesen sein/ vnd daß Gott darumb Jesum Christum/ waren Gott vnd

menschen/ von himmel herab geschickt hatt/ vnd von der reinen Jungfrauen Maria lassen geboren werden/ daß er mitt seinem heyligen blut vns reiniget/ vnnd mit seinem vnschuldigen todt vns dz ewig leben schanckte/ auch mitt seiner aufferstehung vnns rechtfertiget/ vnd jetzund sitzend bey Gott/ vns fürspreche/ vnd vnser mitler were/ biß an der welt end/ da er ein richter wirt sein der gerechten vnd vngerechten.

Frag. Welches ist der dritt punct?

Antwort. Ich glaub in den heyligen geist/ ein heylige/ rc.

Frag. Wa von lautet der dritt punct?

Antwort. Von der krafft des heyligen geists vnd seiner heyligmachung.

Frag. Vnd was bekennen wir mit dem selbigen?

Antwort. Wir bekennen/ daß Christus die salbung/ vnd innerung Gott des heyligen geists/ den kinderen Gottes versprochen/ so in der Christenlichen gemeindt versamlet seind/ denen er auch verzeyhung der sünden/ so glauben vnnd sich bessern/ durch den heyligen Tauff/ vnnd das Nachtmall/ vnnd durch das Wort Gottes verspricht vnnd erinneret/ vnnd leeret sie auch die ware aufferstehung dises fleischs/ vnnd das die Gläubigen ewig mitt Christo leben/ die vngläubigen aber/ mitt dem ewigen zorn Gottes überschüttet werden.

Frag. Was nutz bringt dir diser glaub?

Antwort. Disen nutz bringt er mir/ daß ich durch den glauben/ von wegen Jesu Christi/ für Gottes gericht frumm vnd gerecht geurteilt/ vnd mitt dem heyligen geist begabtwürd/ daß ich zu Gott bitten darff/ vnd jn als ein vatter anruffen/ vnd mein leben nach synen gebotten anrichten/ vnnd gutte werck thun möge.

[Das ander teil - Vom gebett Christi.](#)

Frag. Wie bettet man, liebes kindt?

Antwort. Wie vns vnser HERR Jesus Christus gelernet hatt/ Vatter vnser der du bist in den himmlen/ rc.

Frag. Warumb spristu Vatter?

Antwort. Darumb daß er allein ein getreüwer vatter/ allein gnedig ist/ vnd will daß wir seine kinder seyen.

Frag. Was bedeüt das wörtlin/ Vnser?

Antwort. Das ist so vil/ Du bist nitt allein mein gnädiger vatter/ sonder auch

deren/ die mitt mir auff Christum getaufft seind/ für die ich auch bitte.

Frag. Was vermag das wörtlein/ Inn den himmlen?

Antwort. Das ist/ Ich beken/ dz du ein einziger schöpffer bist aller Creaturen inn himmlen vnd auff erden/ vnd ich hie auff erden vom himlischen vaterland verstossen/ beger zu dir inn die himmlen.

Frag. Welches ist die erste bitt?

Antwort. Geheyliget werde deinn Namm. Das ist/ wir begeren dich allein zu preisen vnnnd anzuruffen/ deß namm allein heylig ist.

Frag. Wie heißt die ander bitt?

Antwort. Zukumme dein reich. Das ist/ nitt das reich von diser welt/ sonder inn dem du herrschest/ mitt deinem ewigen wort/ glauben vnnnd liebe/ vnnnd allen geystlichen gaben.

Frag. Wie heißt die dritte bitt?

Antwort. Dein will geschehe/ auff erden wie im himmel. Das ist/ gib vns gnad/ daß wir deine gebott williglichen hie auff erden mitt himlicher weiß vnd art erstatten.

Frag. Wie heißt die vierdte bitt?

Antwort. Vnser täglich brott gib vns heüt. Das ist/ gib vns alzeit verstand deines Euangelions/ vnnnd Göttlichen worts/ Speise vnns auch leiblichen/ behüt vns vor gottloser sorg der narung.

Frag. Wie heißt die fünffte bitt?

Antwort. Vnd vergib vns vnser Schuld/ wie wir vergebenn vnsern schldneren. Das ist/ verzeihe vnns vnser sünd vnd missethat/ vnd gib vns die gnad/ daß wir von hertzen mögen verzeihen allen so vnns beleidigen.

Frag. Wie heißt die sechste bitt?

Antwort. Nit für vns in versuchnuß. Dz ist/ laß vns nit verderben in anfechtung des fleichs/ der sünden/ vnd der welt.

Frag. Wie heißt die sibent bitt?

Antwort. Sunder erlöß vns von dem bösen. Das ist/ von dem teüffel der vnns in alle böse laster/ vnd schädliche gfarlicheit vnderstat zu werffen.

Frag. Wie heißt der beschluß?

Antwort. Dann dein ist das reich/ vnnnd die krafft vnd die herrlicheit ewigli-

chen. Das ist/ ich bekenn daß du allein gewaltig/ allzeit starck vnnd herrlich  
gnug bist/ so wir solchs suchen/ durch Jesum Christum vns zu geben.

Frag. Was bedeut das wörtlein Amen?

Antwort. Das ist/ Ich glaub du habst mich meiner bitt schon gewäret/ vnnd  
nach deinem vetterlichen willen fürsehung gethon.

Frag. Mitt was sitten/ vnnd gstat leert vns Christus betten?

Antwort. Matthei am sechsten spricht er/ Wenn jr bättend/ sollent jr nitt vil  
geschwätz machen/ wie die Heiden/ dann sie meinent sie werden erhört/  
wann sie vil wort machen. Johannis am vierden/ Die varhafften anbetter/  
werden den Vatter anbetten im geist vnnd in der warheit/ Johannis am vier-  
zehenden/ So jr ettwas werdent den Vatter in meinem namen bitten/ das will  
ich thun/ rc.

### Das dritt teil. Von denn heyligen gebotten Gottes.

Frag. Welches seind die gebott Gottes/ die er Mosi in steine tafflen geschri-  
ben hatt?

Antwort. Ich bin der HERR dein Gott/ der dich auß Egypten/ rc.

Frag. Wie heißt das erst gebott?

Antwort. Ich binn der HERR dein Got/ der dich auß Egypten/ auß dem  
diensthauß gefürt hab/ Du solt kein andere noch frembde Götter vor mir ha-  
ben. Das ist/ du solt Gott deinem herren/ dich gantz ergeben vnd vertrau-  
wen/ in über alle ding lieben vnd förchten/ vnd alle hilff vnd seligkeit zu  
leib vnd seel bey im allein suchen.

Frag. Wie heißt das ander gebott?

Antwort. Du solt dir kein graben/ oder geschnitzte bild machen/ ja gar kein  
bildnuß/ rc. Das ist/ du solt Got/ der daß ewig vnsichtbar gutt ist/ inn kei-  
nem leiblichen ding abbilden/ auch keine seiner Creaturen/ die selbigen an-  
zubetten/ oder göttliche eer beweisen/ oder hilff vnnd seligkeit bey inen zu-  
suchen/ dann Gott wils hoch straffen/ Es verbeüet Gott die bileren so ver-  
eeret werden/ als der Eer Gottes abbrüchig/ vnd vnserem glauben schädlich.

Frag. Wie heißt das dritt gebott?

Antwort. Du solt den nammen des HERREN deines Gotts nitt leichtfertig/  
oder üppiglichen nemmen. Das ist/ du solt Gott nitt lesteren/ nit fluchen/  
oder mitt zaubereyen vmbgeen/ sunder Gott mitt seinem heyligen wort hoch  
achten vnd preisen.

Frag. Wie heyßt das vierdt gebott?

Antwort. Gedenck des Sabbaths/ daß du jn heiligest/ vnnd feirest. Das ist/ wir sollen ewigklich vonn sünden feiren/ vnnd vmb besserung willen/ auff bestimpte zeit/ Gottes wort mitt ernst hören/ Deßgleichen sein heilige puntzeychen bey der gemeyn Gottes begon.

Frag. Wie heißt das fünfft gebott?

Antwort. Du solt dein vatter vnd muter in hohen ehren halten. Das ist/ du solt yederman gehorsam sein/ nach Gottes befelch/ deßinen Elteren/ OBERkeiten/ Zuchtmeistern/ ja allen Christen so vns mit treüwen manen.

Frag. Wie heißt das sechßt gebott?

Antwort. Du solt nit tödten. Das ist/ du solt deinem nächsten sein leben on Gottes befelch nit nemmen/ noch entleiben/ noch hassen/ seinen guten lymat nitt verargen/ sonder jm alles guts beweisen.

Frag. Wie heißt das sibend gebott?

Antwort. Du solt nitt Eebrechen. Das ist/ Du solt dich halten in deinem beruff nach Gottes befelch/ vndalle vnkeüsheit an leib vnd seel vermeiden.

Frag. Wie heißt das acht gebott?

Antwort. Du solt nitt stälen. Das ist/ du solt niemands ettwas mit vnbillicher weiß entfrembden oder verforteilen/ sonder yederman/ so vil dir müglich/ guts thun.

Frag. Wie heißt das neündt gebott?

Antwort. Du solt kein falsche zeügknüß geben wider deinen nächsten. Das ist/ du solt deinen bruder nitt vnbillichen verliegen/ sonder jhm zu aller warheit verhelffen/ vnd erhalten.

Frag. Wie heißt das zehend gebott?

Antwort. Du solt nitt begeren deines nächsten hauß/ Du solt nitt begeren deines nächsten wiebs/ kknacht/ magt/ rc. Das ist/ du solt nitt allein mit eüserlichen sitten vnnd geberden deinem nächsten guts erzeigen/ sonder auch von hertzen schützen vnnd schirmen/ vnd alles so jm Gott gesegnet/ vnnd damitt er begabet/ auch hertzlichen gönnen.

Frag. Warzu seind vns die gebott Gottes geben?

Antwort. Zum ersten darzu/ daß wir leren darauß vnsere sünde vor Gott erkennen. Zum anderen/ daß wir leren gute werck thun/ vnnd ein göllich leben füren.

Frag. Können wir auch die gebott Gottes/ vollkommenlich mit vnsern guten wercken erfüllen?

Antwort. Nein/ dann vnserere gute werck/ seind von wegen der sünden/ darinn wir empfangen vnd geboren seind/ nitt gantz vollkommen gutt. Aber Gott der Vatter hatt vnns seinen Sun Jesum Christum/ der nie kein sünd gethon/ vnd alle gebot Gottes vollkommen erfüllt/ zum eigenthumb geschenkt/ so wir an denn selbigen glauben/ halt vns Gott auß gnaden vnd barmhertzigkeit von wegen Jesu Christi dafür/ als hetten wir selbs alle seine gebott erfüllet.

Frag. Warumb sollen wir gutte werck thun?

Antwort. Nicht darumb/ daß wir mitt vnserem thu ndie sünd büssen/ vnnd ewigs leben verdienen/ Dann Christus hat die sünd allein gebüset/ vnd ewigs leben verdienet/ Sunder darumb/ daß wir vnseren glauben mitt den guten wercken bezeügen/ vnnd dem Herren für seine gutthaten danckbar sein sollen/ rc.

Das vierdt teil dises Catechismi. Von den Sacramenten/ vnd dem gebrauch der Schlüssel.

Frag. Was stands bistu/ liebes kind?

Antwort. Ich binn ein Christ.

Frag. Wa bey erkennet man dein Christenthumb?

Antwort. So ich Jesum Christum durch den glauben bekenne/ vnd durch den tauff inn sein gemeyn bin auffgenommen/ Im nachtmal aber Gott danck sage vmb den todt Christi/ vnd mit yederman befridet/ mitt einem rechten Christlichen leben/ auch sein wort zu einem trost mit fleiß vnd ernst gern höre.

Frag. Was ist aber der Tauff?

Antwort. Der tauff ist ein Sacrament vnd göttlich wortzeichen/ damit sich Got der Vatter durch seinen sun Jesum Christum/ sampt dem heyligen geist verspricht/ daß er dem getaufften ein gnediger Got wölle sein/ vnd jm verzeihen alle seine sünd/ vnd jn auffnemen an eines kindts statt/ vnnd erben aller himlischen güteren.

Frag. Mit welchen worten ist das Sacrament des tauffs von Jesu Christo in-gesetzt?

Antwort. Matthei am letsten/ da der Herr zu seinen Jüngern sprach/ Gond

hin vnd lernet alle völker/ vnd tauffent sie in dem nammen des vatters/  
vnd des suns/ vnd des heyligen geistes/ vnd lerent sie alles waß ich euch be-  
folhen hab. Des glychen Marci am letsten/ Gond hin in alle welt/ vnnnd pre-  
digen das Euangelium allen Creaturen/ wer glaubt vnnnd taufft virdt/ der  
wirdt sällig werden/ wer aber nitt glaubt/ wirt verdampt werden.

Frag. Was ist das Nachtmal vnsers Herren Jesu Christi?

Antwort. Es ist ein Sacrament/ vnnnd ein göttlich wortzeichen/ darin Chris-  
tus mitt dem brot vnd wein der dancksagung denn Gläubigen/ sein leib vnd  
blutt/ warhafftiglichen darreicht/ vnd vergwisset sie darmit/ daß sie habend  
verzeihung der sünden/ vnnnd das ewig leben.

Frag. Wie lautend die wort der insatzung des Nachtmals Christi?

Antwort. Inn der nacht da der HERR verraten ward/ vnnnd mit seinen jünge-  
ren zu tisch sasse/ namme er das brot in sein heylige hendt/ sagt danck sei-  
nem Hymlichen Vatter/ segnets/ brachs/ gab es seinen Jüngeren/ vnd  
sprach/ Nement hin vnd essent/ das ist mein leib/ der für eüch hingeben  
wirdt/ solchs thut zu meiner gedechtnuß/ Des selbigen gleichen nach dem  
abentmal nam er den kelch/ sagt danck vnd sprach/ Nement hin vnnnd trin-  
cken alle darauß/ Dz ist der kelch des neüwen Testaments in mynem blut/  
das für euch vnnnd für vil vergossen wirt/ zur vergebung der sünden/ Sol-  
lichs thut/ so offft jr das thund/ zu miner gedechtnuß.

Frag. Welches seind die schlüssel zum himmelrich?

Antwort. Die predig des heyligen Euangelions von Jesu Christo.

Frag. Wa ist das Predigampt von Jesu Christo eingesetzt?

Antwort. Luce am zehenden Capitel/ Wer eüch höret/ der höret mich/ wer  
eüch verschmächt/ der verschmächt mich. Matthei am sechtzehenden/ Ich  
will dir die schlüssel des himmelreichs geben/ alles waß du auff erden bin-  
den wirst/ sol auch im himmel gebunden sein/ vnd alles was du auff erden  
lösen wirst/ soll auch im himmel loß sein. Johannis am zweintzigsten capi-  
tel/ Nemend hin den heyligen geist/ welchen jr die sünd verzeihen/ denen  
seind sie verzygen/ vnd welchen jr die sünd behalten/ denen seind sie behal-  
ten/ rc.

## **Einn Christliche leer...**

**... auß den heyligen Aposteln Petro und Paulo für die eeleüt/ dienst-  
knecht/ und mägdt/ die einn diener der Kirchen neben dem kinder Ca-**

## techismo verlesen vnnnd kurtzlichen ermanen mag.

Vrgeliebten im HERREN/ jr habt vernommen die Christliche leer/ so denn jungen Christlichen kindern fleissig fürgetragen/ damit aber eüwer liebe nit on vnderweisung hingange/ so lerende die heyligen Aposteln also.

Eph. VI.	Colossens. III.
1. Timoth. II.	1. Petri III.

### Den mannen.

Ihr menner liebet eüwere weiber/ glich wie Christus geliebt hat die Kirchen/ vnd seind nit bitter gegen jhnen/ vnnnd wonend bey jnen mitt vernunft/ vnnnd geben dem weibischen als dem schwachsten geschirr sein eer. Vnd ich will/ daß die mann bettend an allen orten/ vnd auffhebend heylige hend on zorn vnd widerwillen. Es sollen auch die menner jre weiber lieben als jr eigene leib/ wer sein weib liebet/ der liebet sich selbs.

### Den weibern.

Die weiber seyend vnderthon jren mannen als dem Herren/ vnd wie sich gebürt/ auff daß auch die mann so nitt glauben an das wort/ durch der weiber wandel on wort gewonnen werden/ wann sie ansehen eüwern keüschen vnd lautern wandel in der forcht/ welcher kleydung soll sein mit schamm vnd zucht/ nit mit zöpffen oder gold/ oder pärlin/ oder kostlichem gewand/ sondern wie es wol anstat den weibern/ die da gottseligkeit beweisend durch gute werck. Ein weib lerne inn der stille/ mitt aller vnderthänigkeit. Einem weib aber gestatte ich nit daß sie lere/ auch nitt daß sie des manns herr sey/ sondern stille sey/ Dann Adam ist am ersten gemacht/ darnach Eua/ Vnnnd Adam ward nicht verfür/ das weib aber ward verfür/ vnd hat die übertretung eingefürt/ Sie wirt aber selig werden durch kinder geben/ so sie bleibt im glauben/ vnnnd in der liebe/ vnd in der heyligung mit der zucht.

### Den Hauszherren.

Ir Herren/ waß recht vnnnd gleich ist/ daß beweisend den knechten/ vnnnd wissend daß jhr auch einen Herren im himmel haben/ vnd vnderlassend das tröwen/ dann vor Gott istk ein ansehung der personen/ es sey knecht oder herren/ oder freyer.

Für die knecht ein leer vnd zucht.

Die knecht sollend vnderthon sein jren Herren mitt aller forcht/ vnd inn allen dingen gefällig/ nitt allein den gütigen vnnd freündtlichen/ sonder auch den vnngeschlachten/ dann das ist ein gnad/ so yemandt vmb gewissens willen zu Gott traurigkeit vertregt/ vnd leidet mit vnrecht/ Dann was ist daß für ein preiß/ so jhr vmb mißthat willen streych leiden? Darumb seind gehorsam mit forcht vnd mit zittern/ in einfaltigkeit eüwers hertzens/ als Christo/ nit mitt dienst allein vor augen/ als denn menschen zugefallen/ sonder als die knecht Christi on widerbellung/ vnd nicht entragen/ sonder alle güte trew erzeygend/ auff daß die leer Gottes vnsers heylands gezieret werde in allen stucken.

Den vättern.

Ihr vätter/ reytzend eüwere kinder nit zum zorn/ sonder ziehend sie auff in der zucht vnd vermanung an denn HERREN.

Den kindern.

Ihr kinder sein gehorsam eüweren eltern inn dem HERREN/ dann das ist billich/ Eer dein vatter vnnd muter/ das ist das erst gebott/ daß ein verheysung hat/ auff daß es dir wol gange/ vnnd lang lebest auff erden.

---

## Zum beschlusz der kinder ein lobgesang

YEtzund so bitten wir dich herr  
Bestätt vnd sterck die war leer  
Inn vnsern hertzen allen/  
Dann das ist war/ wie böß wir sind  
Begerend wir doch deine Kind  
Zusein/ und dir zugfallen:  
So zeig nun Got dyn gnad vnd gunst  
Erfül das hertz mitt warer brunst/  
Der liebe vnnd deß glaubens/  
Daß wir mögend wie es dir gefelt/  
Das leben schleüssen vnnd der welt  
Gar bald zum end erlauben.

Also laszt man die Kinder gon.

DER HERR der eüch erschaffen vnnnd mitt leib vnd seel begabet/ der gese-  
ne vnd behüte eüch vor aller sündtlicher vnnnd schädlicher gefärlicheit.  
Amen.

## Quellen:

Sämtliche Texte sind der [Glaubensstimme](#) entnommen. Hier sind zumeist auch die Quellangaben zu finden.

-----  
Die Bücher der Glaubensstimme werden kostenlos herausgegeben und dürfen kostenlos weitergegeben werden.

Diese Bücher sind nicht für den Verkauf, sondern für die kostenlose Weitergabe gedacht. Es kommt jedoch immer wieder zu Fragen, ob und wie man die Arbeit der Glaubensstimme finanziell unterstützen kann. Glücklicherweise bin ich in der Situation, dass ich durch meine Arbeit finanziell unabhängig bin. Daher bitte ich darum, Spenden an die **Deutsche Missionsgesellschaft** zu senden. Wenn Ihr mir noch einen persönlichen Gefallen tun wollt, schreibt als Verwendungszweck „Arbeit Gerald Haupt“ dabei – Gerald ist ein Schulkamerad von mir gewesen und arbeitet als Missionar in Spanien.

Spendenkonto: **IBAN:** DE02 6729 2200 0000 2692 04,  
**BIC:** GENODE61WIE

Alternativ bitte ich darum, **die Arbeit der Landeskirchlichen Gemeinschaft Schlossplatz 9 in Schwetzingen zu unterstützen.** Die Landeskirchliche Gemeinschaft „Schlossplatz 9 in Schwetzingen ist eine evangelische Gemeinde und gehört zum Südwestdeutschen Gemeinschaftsverband e. V. (SGV) mit Sitz in Neustadt/Weinstraße. Der SGV ist ein freies Werk innerhalb der Evangelischen Landeskirche. Ich gehöre dieser Gemeinschaft nicht selber an, und es gibt auch keinen Zusammenhang zwischen der Gemeinde und der Glaubensstimme, doch weiß ich mich ihr im selben Glauben verbunden.

LANDESKIRCHLICHE GEMEINSCHAFT „SCHLOSSPLATZ 9“ 68723  
SCHWETZINGEN

Gemeinschaftspastor: M. Störmer, Mannheimer Str. 76,  
68723 Schwetzingen,

IBAN: DE62 5206 0410 0007 0022 89  
Evangelische Bank eG, Kassel

Andreas Janssen  
Im Kreuzgewann 4

69181 Leimen

Natürlich suche ich immer noch Leute, die Zeit und Lust haben, mitzuarbeiten - wer also Interesse hat, melde sich bitte. Meine Email-Adresse ist: [webmaster@glaubensstimme.de](mailto:webmaster@glaubensstimme.de). Insbesondere suche ich Leute, die Texte abschreiben möchten, bestehende Texte korrigieren oder sprachlich überarbeiten möchten oder die Programmierkenntnisse haben und das Design der Glaubensstimme verschönern können.

# Inhaltsverzeichnis

Vorwort	1
Befragung vor dem Abendmahl	2
Catechismus und Underweisung christenlichs Glaubens	3
Vorrede	3
Das Vatter vnser.	5
Der Christenlich Glaub.	5
Die gebott Gottes/	5
Dieweil der Glaub ein anfang des heyls/ vnd die thür ist zu der waren erkantnuß Gottes/ so ist das erst theil vnd fragstuck von Christenlichem glauben	7
Das ander teil - Vom gebett Christi.	8
Das dritt teil. Von denn heyligen gebotten Gottes.	10
Das vierdt teil dises Catechismi. Von den Sacramenten/ vnd dem gebrauch der Schlüssel.	12
Einn Christliche leer...	13
Den mannen.	14
Den weibern.	14
Den Hauszherren.	14
Für die knecht ein leer vnd zucht.	15
Den vättern.	15
Den kindern.	15
Zum beschlusz der kinder ein lobgesang	15
Also laszt man die Kinder gon.	15
Quellen:	17